

INUIT ATAQATIGIIT INATSIARTUNI



UKA2022/81

26.10.2022

Mikivisuk Thomassen

Innuttaasut peqqissutsikkut sullinneqarsinnaanissaat anguniarlugu cubameersuni peqqinnissaqarfimmi sulisunik sulilersitsiniaanissamut suliniut unitsinneqarallarsimasoq aallarnisaqqinnissaa anguniarlugu Naalakkersuisut peqquneqarnissaanik Inatsisartut aalajangiiffigisassaattut siunnersuut. Aallarnisaaneq 2022 naatinnguuq pissaaq.

(Inatsisartunut Ilaasortaq Anna Wangenheim, Demokraatit)

Peqqinnissaqarfimmi sulisussaaleqineq ukiuni kingullerni annertusiartoupiloorsimavoq. Tamannalu nassuerutigineqarmat pissusissamisoorpoq. Ajornartorsiut annertoq suliassatut pimoorullugu tiguneqartariaqartoq Inuit Ataqatigiit isumaqarpugut.

Nunarsuatsinni nunarpassuarni nakorsassaaleqineq annertullunilu imaannaanngitsuvoq ilungersunartoq. Nunarsuaq tamakkerlugu ajornartorsiut annertusiartortoq ilisimaaraarput illuatungaanilu nunatsinni nakorsaqaarniarneq ilungersunartuuvoq, qujanartumilli pitsaasuvoq nakorsanik aalajaatsunik suli naammattuugassaqaartarmat.

Inuit Ataqatigiit isumaqarpugut partiit tamarmik siunissamut ungasissumut ataatsimoorussaasunik aalajangersaasariaqartut. Siunertarlu tamanna Naalakkersuisut timitalersuiffigisagaat kaammattuutigaarput. Ukiuni aggersuni peqqinnissaqarfimmi sanngheetit aqqiivigisassavut nalorninaatsumik aningaasalersorlugillu aqqissuunneqarsinnaaqqullugit suliniutigineqassapput.

INUIT ATAQATIGIIT INATSISARTUNI



Ilanngullugu Inuit Ataqatigiit piumasaraarput inoqarfinni tamani peqqissaaviit nakorsiartarfiillu sanngiillisarnagit nukittorsaavigineqarnissaat Naalackersuiinikkut qulakkeerneqarnissaat kissaatigigatsigu. Soorunami aamma nakorsassaaleqineq anigorumallugu nunatta avataaniit aamma danskit nunaata avataaniit nakorsanik sulerusuttunik pissarsiorsinnaaneq piviusunngortillugulu ajornannginnerulersinneqartariaqarpoq.

Nunatsinni peqqinnissaqarfik tassaasariaqarpoq nunatsinni inuit naatsorsuutigisinnaasaat. Napparsimasunik sumiiffimmut ataasiinnarmut assartuinersuaq, qitusoqarfiillu kisiisa aallaavigalugit peqqinnissaqarfimmi aaqqissuussisimaneq naammaginangilaq. Nunatsinni inuit naatsoresuutigisinnaasaannik peqqinnissaqarfik aaqqissuuteqqinneqartariaqarpoq, aamma sillimaniarnikkut pitsaasumik nunap inuinit isumalluutigineqarsinnaasunngorlugulu.

Atortulersuutit nappaatinik suussusersiutit nutartertariaqartut pisariaqartinneqartullu aningaasanik naleqarmata partiit suleqatigiillutik siunissami ukiuni amerlasuuni anguniagassaminnik ataatsimoorussaqaarnissaat avaqqunneqarsinnaangilaq. Peqqinnissaqarfimmi nutarterisoqassappat aamma politikkikkut nutarterisoqartariaqarpoq. Tamanna Inuit Ataqatigiit piareersimalluta suliassatut aallartitassatut Naalackersuisunut partiinullu tamanut isummerfigeqqullugu kaammattuutigaarput.

Takusinnaavarput ukiumut nakorsatut ilinnialerniarlutik aallartsittartut suli ikippallaarput, tamannalu soorunami eqqarsaasersornarpoq unammillernartuullunilu. Nakorsanngornissamut kajuminneq soqutiginarsaanikkut annertusarlugulu suliffimmi atugassarititaasut ilumut pitsaasuunersut nalilersuisoqartariaqarpoq.

Peqqinnissaqarfimmili ilinniarsimasunik amigaateqartillugu ilinniartitseqqiineq suli inerisarneqartariaqarsinnaanera periarfissat annertusarneqarnissaanut

INUIT ATAQATIGIIT INATSISARTUNI



annertusaasariaqartugut takussutissat ilagaat, taamaammat pingaaruteqarluinnartutut isigaara qanoruna peqqinnisaqarfimmut tunngatillugu ilinniartsiteqqiinerit pitsaasumik angusaqarfigisinnaagigut siunissaq eqqarsaatigalugu.

Ilanngullugu misissugassaqqittutut isigaarput peqqinnisaqarfimmi sulisut nunaqavissut aammalu nunatta avataaneersut atukkamikkut sulinikkullu atugassarititaasut qanoq naliliinerat paasisaqarfigerusunnarmat. Tusartakkat malillugit suleriaatsit sullisseriaatsillu allanngorarpallaarujussuarnerat sulisartunut aalajaatsunut pitsaanngitsoq oqaatigineqartarmat.

Nunap inui isumaqarpunga pitsaasumik sullinneqarnissaat qulakkeertussaagipput, ilaqarpugummi oqaatsit tungaatigut piginnaanermikku killilimmik pigisaqartunik, siunnersuut malillugu oqaatit aporfiusinnaanerat eqqumaffigineqartariaqarmat naqissuserusuppara, oqaatsilli pillugit innuttaasunut inorsiissannginnatta naqissuserusuppara, kiisalu cubameersunik toqqaannartumik sulisoqalersinnaanera, inuttaasunut pitsaasumik sullissisinnaanerat qulakkeersimatinnagu nunallu allat isiginiarneqannginnerat uani saqqummiussami maluginiarpara.

Nunatta avataanit sulisussarsiortarneq aporfiit ilagisaat soorunami siullertut eqqaarusunnarpoq taannaammammi aqqitassaq, iluaqutaallunilu ajoqutaasinnaasoq nunap inuinit illersuisuugami pitsaasumik sullinneqarnissatsinnut qulakkeerinnittuusoq, aammalu aporfilersuisuusoq piginnaaneqarluartunik peqqinnisaqarfimmi sulisoqarnissatsinnut killilersuisuusoq.

Nunatsinni peqqinnisaqarfimmi sulisussanik amerlanernik nakorsaannaanngitsumik amigaateqarnerput annertusiartortillugu ilanngullugu eqqaarusuppara, nunatsinni ilinniarsimassutsikkut annertusaasariaqarnerput

INUIT ATAQATIGIIT INATSIARTUNI



pingaaruteqartut ilagaat, nunatut ilungersuataaginnarsinnaanngikkutta siunissami eqqumaffigisassatta ilagilluinnarpaat.

Peqqinnissaqarfimmi ukiuni arlalinni sulisuusunik peqarnerput tanngassimaarutigisariaqakkatta ilagivaat taakuummata kivitseqataasut.

Nunanili allanik isumalluusersuinnarsinnaannginnerput tikkuarusutama ilagivaat, assersuutigisinnaavara ilinniartitseqqiineq qanoruna pitsaanerulernissaanut iliuuseqarniartugut, soorunami nunatta avataaneersunik pisariaqartitsiuaannartussaavugut sulisoqarnissatsinnut nunatut ineriartussagutta.

Inuit Ataqatigiinniit kissaatigaarput misissuineq pinnagu Naalakkersuisut peqquneqassasut aaqqiissuteqartoqarnissaanik suliaqartoqassasoq.

Inuit Ataqatigiinniit taamatut oqaaseqarluta Ilaqutariinnermut Peqqissutsimullu ataatsimiititalianut ingerlateqqipparput.